

改良道德書之一

世界的倫理學
個人主義

中曆辛亥三月卽

西曆一千九百十一年五月

上海廣學會重印

改良道德書之一



世界的倫理學
個人主義

中曆辛亥三月卽

西曆一千九百十一年五月

上海廣學會重印

MORAL SCIENCE

AN ORIGINAL WORK

BY

MR. CHANG SHUN-YI,

MEMBER OF C. L. S. STAFF,

SHANGHAI

(REPRINTED FROM THE **TA TUNG PAO**)



PUBLISHED BY
THE CHRISTIAN LITERATURE SOCIETY FOR CHINA
SHANGHAI

—
1911

倫理學序

國運盛衰。視道德爲轉移。而道德進退。則關係民智通塞。且視其學理之果能孕育完善風教與否爲衡。故學者非放開眼界。縱觀上下數千年之活潑世界。而推究乎萬國興敗之由。決不足言紀綱制度之得失。而判斷道德之是非。道德者因時因地。與人心相緣。公認爲至善者也。特世運愈進。人智愈啓。風氣日開。彼此今昔之異形焉。知時務者固不難於會通。而在尊古者之心理。則因久縛於自來之風尚。以致新道德無由牖啟其聰明。以爲世局進化助。如是欲與文治日進之國民齊驅。難矣。噫。孰與辨道德之得失哉。夫道德之實踐爲倫理。吾國倫理。肇自契敷五教。而夏校殷序周庠。代宏教育。尙已。奈世會趨新。而宗法不變。父子夫婦兄弟三者。皆不出家庭範圍。至社會國家。則僅有朋友君臣。不能完其責。若求有以暢發乎斯人之世界思想。以期上達天德者。更戛戛其難。況尊卑階級過嚴。家政國政。專制之流弊尙存。沮滯人權發達。羣治進步。職

是故耳。彼泰西各國之宗基督教也。視人無幼長貴賤。皆天之臣。在在務本上。天愛人之心。以期兼善天下。庶天理之周流無間。小己大羣。莫非自由幸福矣。況彼自希臘三大哲。及近倍根笛卡兒諸鉅儒出。恆各欲獨樹一幟。不屑墨守師訓。種種學說。皆足以補助宗教。力資道德之進行。而國勢遂漸由教學二者以大振。故英美德各國。莫不重視宗教。以其爲人倫之至也。而東亞教育家。因無宗教。乃代之以倫理。無如吾國舊道德。頗多不適今世之用。則不得不取人之長。以自補其短。雖改良道德之說。爲薦紳先生所咋舌。而世界大勢所趨。要非一二強有力者所能抗拒。惟是心醉歐風。則恐盡失宗邦之文化。而力保國粹。又虞不適運會之遷流。用是吾國譯著之書日富。而倫理獨乏善本。誠難之也。夫士生今日。實爲世界之一人。倘不備世界道德。何以能完成世界人格。長享世界利權。故非周知乎世界列雄。所以致富強之真理。則不能致吾國於太平。尤非本原乎吾國四千年之文教。以協同乎世界之新道德。則亦不易淪國

民之新理想。使其貫澈天人。融會新舊。而進智德程度於高尚之域。世有欲造就英雄與時勢者。當非合歐亞文明一爐而冶之不爲功。不佞學識淺陋。憂時心切。謹貢一得之愚。冀與吾黨共謀改良社會。以新吾祖國。且使世界進化於無既。自知謬妄。無所逃罪。遠識之士。或有取以爲淑身淑世之一助云爾。庚戌季秋漢陽張純一序



例言

一此篇係庚戌春莫在廣學會。應全浙優級師範講席之聘。冀改良道德而作。未幾以暑假返滬。同事英儒季理斐君。一再挽留。襄理筆政。且敦促將前稿續成。刊登大同報。出至辛亥二月始訖。因重檢付梓。附誌緣起如此。

一吾國自來講學者。往往盲從古人。卒至失其故步。無裨人世。不佞深痛之。因欲爲後起之英。盡鑄新腦。使自能產新真理。不爲從來一切政學風教囿。庶可孕育無限之文明。

一篇中立言。每注目未來人心世道。欲爲無數時代。無數人類。謀福樂之增進。於不已。舍此宗旨。雖天下人所推崇者。必棄之。合此宗旨。雖天下人所鄙棄者。必崇之。直覺世俗好惡。無干我事。知我罪我。是在明哲。

一學者認理不真。往往心隨勢利轉。致失法身我相。此吾國學理。所以日晦也。不知讀書明道。能立一言或一行。以大利乎人羣。其真榮當千百倍於厚分。

人利無所酬答之帝王。不佞識短心長。甚願有志之士。都能上達天德。鍊成黃金人格。點污不染。何幸如之。

一冒彰之衆。同具性靈。苟富慈愛心。善爲說法。使生大智力。皆無難成聖果。倘智已愚人。識量隘陋。安能爲天民盡先覺之責。不佞頗注重於此。尙希扶世翼教之彥。時留意焉。

一天下事理。極活潑而無窮。著爲文言。已成糟粕。卽此篇所言。不過對方今時勢。略啓端緒。世事變遷無常。今日新奇。明日陳腐。一二年後。又知奚似。況一節甫成。必旋自覺其誤。有待補正者不少。則其不自覺者。更不知凡幾。故不佞懼或束縛學人理想。致道德不能隨時精進。重滋內疚也。尙希名碩。時匡不逮。

一拙作教通。教育學。教育餘談。均力棄陳腐。可資參證。附告通儒。藉希賜教。

CONTENTS

CHAPTER I. Introduction.

- | | | |
|---------|------|-------------------------------|
| SECTION | I. | Origin and Outline of Ethics. |
| " | II. | Origin of Conscience. |
| " | III. | Search for the Highest Good. |
| " | IV. | Following the Golden mean. |
| " | V. | Methods of studying Ethics. |

CHAPTER II. Will-power.

- | | | |
|---------|------|-----------------------------------|
| SECTION | I. | Ego. |
| " | II. | On Copying the Best Examples. |
| " | III. | Fate. |
| " | IV. | On the Right Performance of Duty. |
| " | V. | On Preparation for Death. |

CHAPTER III. Mutual Duties.

- | | | |
|---------|--------|---|
| SECTION | I. | Husband and Wife. |
| " | II. | Parents and Children. |
| " | III. | Brothers and Relatives. |
| " | IV. | Master and Servant. |
| " | V. | Teacher and Pupil. |
| " | VI. | Friendship. |
| " | VII. | The Public Good. |
| " | VIII. | The Limitations of Individual Liberty. |
| " | IX. | Honesty. |
| " | X. | Etiquette. |
| " | XI. | Love. |
| " | XII. | The Relation of the Citizen to the State. |
| " | XIII. | The Duty of Paying Taxes and acting as Soldiers. |
| " | XIV. | Duties in regard to the State. |
| " | XV. | On Education, Art, and Religion. |
| " | XVI. | International Law. |
| " | XVII. | Intercourse and the Unification of Educational Methods. |
| " | XVIII. | On Government and Religion. |

CHAPTER IV. On Man's Duty towards God.

- | | | |
|---------|------|---|
| SECTION | I. | On Reverence. |
| " | II. | On the Performing of God's Will. |
| " | III. | On Finding Peace in His Love and Leading Others to do the same. |

倫理學目次

第一章 緒論

第一節 倫理學之緣起及概要

第二節 良心之起原

第三節 道德之認真

第四節 時中之要旨

第五節 研究法

第二章 立己

第一節 求我

第二節 尙友

第三節 造命

第四節 力職

第五節 備死

第三章 接人

第一節 夫婦

第二節 親子

第三節 兄弟及族戚

第四節 主僕 以上家族倫理

第五節 師弟 學校倫理

第六節 交游

第七節 公益

第八節 權限

第九節 信實

第十節 禮節

第十一節 博愛 以上社會倫理

第十二節 國民與國家及國憲之關係

第十三節 納稅與兵役之義務

第十四節 公共事業之責任

第十五節 學術風教之改良 以上國家倫理

第十六節 國際公法與私法

第十七節 人物之交通及學術之統一

第十八節 政教之大同 以上世界倫理

第四章 對天

第一節 主敬

第二節 善演

第三節 安仁

倫理學

漢陽張純一仲侯著

第一章 緒論

第一節 倫理學之緣起及概要

有天地然後有萬物。有萬物然後有男女。有男女然後有夫婦。有夫婦然後有父子。有父子然後有家族。有社會。有國家。有世界。而人道於是乎大備。倫理具焉。

天地萬物。因有人而益大活潑之觀。故人兼天地爲三才。文中子曰。三才之道不相離。揚子雲曰。天辟乎上。地辟乎下。人辟乎中。人固有不可不爲天地立心。爲萬物作宰者在。而所以立天地心。作萬物宰之理。卽倫理。家族也。社會也。國家也。世界也。亦猶天地萬物。日與吾身以相緣。不容其獨離而外之。而必待以爲之心。爲之宰者然。安可處之無其道乎。

上古世界。稱文明者。吾國而外。曰印度。曰埃及。曰巴比倫。曰希臘。埃及巴比倫之文明。久已不足徵矣。而吾國與印度。在東洋爲最著。其倫理與西洋頗多吻合。西洋倫理。發源於希臘。希臘人海列德斯 Heracitus 有火氣水地等說。而印度已先有地水火風四大說。吾易八卦實備具之。如以土爲地屬。則與五行同其三。又希人比他拉士 Pythagoras 謂萬物皆出於數。數分奇偶。亦卽吾陰陽之說。可見上古時講倫理者。皆本於自然之現象。是爲哲學的倫理。迨蘇格拉底 Socrates 出。哲學益精密。而道德的倫理萌芽焉。今西洋倫理學者。皆稱蘇氏爲開祖。氏有西洋孔子之稱。其言倫理。較孔子之有所祖述爲難。繼起者。有柏拉圖 Plato 亞理士多德 Aristotle 諸人。皆多所發明。其學說與吾國暗合者。正復不少。蓋希臘哲學。多自東方各國輸入。而大道初不因地而異。彼其學者。乃皆欲各樹一幟。雖師說亦無敢墨守。故其學理日形發達。利益泰西不少也。

西洋倫理。與基督教關係密切。基督教雖出自東洋小亞細亞。而傳之西洋。歐美各國。皆崇奉之。以致強盛。轉較吾國之奉儒教。印度之奉佛教。阿剌伯之奉回教。而皆衰弱者大異。豈耶教之理。獨與儒佛等教異耶。以言敬天愛人。與儒教固不符合。其重改悔。務救世。與佛教亦無歧異。至回教從之而出。可無論已。顧何以西洋獨強盛。乃爾。無他。修道之謂教。亦視乎實行不實行而已。不實行。謂之無教可也。何倫理之足云。能實行。則無教非倫理矣。況彼之奉其教者。又常能取哲學之理論以光大之。更取物質的文明以滋補之。學理以競爭而進化。勢使然也。

近世法儒笛卡兒 Descartes 主獨斷。英儒培根 Bacon 主經驗。霍布士 Hobbes 主自利。洛克 Locke 主幸福。邊沁 Bentham 主功利。德儒康德 Kant 主純理。種種理論。皆足以資倫理之進步。而西洋倫理。由是益昌明矣。東洋倫理。以哲學爲本。而宗教卽由之出。無有異致。承教者因無外來刺激。相